



Ciorclán 0050/2019

**Chuíg: Údaráis Bhainistíochta na mBunscoileanna, na Meánscoileanna, na
bPobalscoileanna,
agus na Scoileanna Cuimsitheacha Aitheanta
agus
Príomhfheidhmeannaigh na mBord Oideachais agus Oiliúna**

**Tuarastail athbhreithnithe na mball foirne uile a n-íocann scoil aitheanta nó Bord
Oideachais agus Oiliúna go díreach leo, ar tuarastail iad a mbeidh éifeacht leo ón 1
Meán Fómhair 2019**

1. Is mian leis an Aire Oideachais agus Scileanna údaráis bhainistíochta agus Príomhfheidhmeannaigh na mBord Oideachais agus Oiliúna a chur ar an eolas faoi chur i bhfeidhm na méaduithe tuarastail le héifeacht ón 1 Meán Fómhair 2019.
2. Tugadh na rátaí athbhreithnithe tuarastail isteach mar thoradh ar Chomhaontú Cobhsaíochta na Seirbhíse Poiblí 2013 – 2020 (Comhaontú Bhóthar Haddington/Comhaontú Bhóthar Lansdún) agus ar an Acht um Pá agus Pinsin Seirbhíse Poiblí, 2017.

Méaduithe Tuarastail a mbeidh éifeacht leo ón 1 Meán Fómhair 2019

3. Déanfar tuarastail bhliantúlaithe a mhéadú faoi 1.75% le héifeacht ón 1 Meán Fómhair 2019.

Catagóirí na mball foirne a ndéanfar difear dóibh

4. Aon bhaill foirne atá fostaithe ag scoil aitheanta nó ag Bord Oideachais agus Oiliúna agus a thagann faoi aon cheann de na catagóirí seo a leanas:
 - Teagascóirí (Seirbhís Litearthachta, Oideachas Pobail agus Oideachas Aosach, etc.);
 - Baill foirne neamhtheagaisc a oibríonn i dTionscadail Chomhchaidrimh don Ógra;
 - Coimhdirí ar Bhusanna Scoile;
 - Aon bhaill foirne eile atá fostaithe go díreach ag scoil aitheanta nó ag Bord Oideachais agus Oiliúna agus a cuimsíodh le Ciorclán 70/2010 (seachas Rúnaithe, Airígh agus Glantóirí a chistítear le deontas, ar daoine iad a chuimsítear le Ciorcláin 0076/2018 agus 0077/2018).
5. Tá sé tábhachtach a rá gur chun críocha na reachtaíochta seo, agus chuige sin amháin, a

thagann na baill foirne lena mbaineann atá fostaithe ag scoileanna aitheanta nó ag Boird Oideachais agus Oiliúna faoin sainmhíniú ar “sheirbhíseach poiblí” agus nach ndéanann sé seo aon difear don stádas fostaíochta atá acu ar aon bhealach eile.

Rialuithe Feabhsaithe i dtaca le Téarmaí agus Coinníollacha Fostaíochta a Comhaontaíodh le héifeacht ón 30 Samhain 2015

6. Meabhraítear d’fhostóirí gur leasaíodh an tAcht Airí agus Rúnaithe (Leasú), 2011, faoin Acht um Bearta Airgeadais Éigeandála ar Mhaithe le Leas an Phobail 2015 chun rialuithe feabhsaithe a thabhairt isteach i dtaca le téarmaí agus coinníollacha fostaíochta a comhaontaíodh idir seirbhísigh phoiblí agus a bhfostóirí is comhlachtaí seirbhíse poiblí le héifeacht ón 30 Samhain 2015. Tá na hailt ábhartha den Acht leagtha amach in Aguisín 1. I gcás ball foirne atá fostaithe ag Boird Oideachais agus Oiliúna, déileálfar le ró-íocaíochtaí de réir na nósanna imeachta atá leagtha amach i gCiorcláin 0084/2015 nó 0032/2016.

Baill foirne páirtaimseartha/baill foirne a n-íoctar leo in aghaidh na huaire

7. Féadfar pá na mball foirne páirtaimseartha nó na mball foirne a n-íoctar leo in aghaidh na huaire a athbhreithniú, de réir gnáthshocruithe, trí thagairt a dhéanamh do phá na mball foirne lánaimseartha lena mbaineann siad chun críocha pá de réir an Chiorcláin seo.

Ragobair

8. I gcás grád incháilithe, ba cheart íocaíochtaí a bhaineann le ragobair a chuirfear i gcrích ón 1 Meán Fómhair 2019 a ríomh trí thagairt a dhéanamh do na rátaí athbhreithnithe pá a mbeidh éifeacht leo ón 1 Meán Fómhair 2019.

Scaipeadh agus Ceisteanna

8. Cinntigh go dtabharfar cóipeanna den Chiorclán seo do gach comhalta den Bhord Bainistíochta/de Bhoird Oideachais agus Oiliúna agus go dtarraingeofar aird na mball foirne uile lena mbaineann ar a bhfuil ann, lena n-áirítear iad sin atá as láthair le cead.
9. Is féidir teacht ar an gCiorclán seo ar shuíomh Gréasáin na Roinne ag www.education.ie
10. Ba cheart ceisteanna maidir leis an gCiorclán seo a sheoladh trí ríomhphost chuig financialetb@education.gov.ie

Martina Mannion
Príomhoifigeach
Rannán Pearsanra Airgeadais/Riaracháin
na mBord Oideachais agus Oiliúna

Tara Carton
Príomhoifigeach
Aonad Caidrimh na Foirne
Seachtraí

AGUISÍN 1

Alt 12 den Acht um Bearta Airgeadais Éigeandála ar Mhaithe le Leas an Phobail 2015

Leasú ar an Acht Airí agus Rúnaithe (Leasú), 2011

Leasaítear an tAcht Airí agus Rúnaithe (Leasú), 2011, tríd an alt seo a leanas a chur isteach tar éis alt 16:

“Téarmaí agus coinníollacha seirbhíseach poiblí a rialú

16A. (1) I gcás—

(a) go ndéanfaidh an tAire téarma nó coinníoll a cheadú mar théarma nó coinníoll a mbeidh feidhm aige de thuras na huairé i leith fhostaíocht aon aicme nó aon chatagóire de sheirbhíseach poiblí (cibé acu a bheidh an ceadú sin i bhfoirm ceadaithe, i bhfoirm aon chineáil eile cheada nó i bhfoirm toiliú a bheidh á thabhairt ag an Aire le haghaidh cinneadh ó dhuine eile sa ní), agus

(b) go rachfar isteach i gconradh fostaíochta i leith seirbhíseach poiblí a thagann faoin aicme nó faoin gcatagóir sin, ar conradh é ina bhfuil téarma nó coinníoll a chomhfhreagraíonn don téarma nó don choinníoll arna cheadú, nó atá coibhéiseach leis an téarma nó leis an gcoinníoll arna cheadú, ach atá níos fabhraí don seirbhíseach poiblí ná an téarma nó an coinníoll sin,

beidh feidhm ag an gconradh amhail is dá ndéanfaí an téarma nó an coinníoll arna cheadú (dá dtagraítear ‘an téarma nó an coinníoll ceadaithe’ i bhfo-ailt (2) agus (3)) a chur in ionad an téarma nó an choinníll chéadluaite i mír (b) (dá dtagraítear ‘an téarma nó an coinníoll neamhcheadaithe’ i bhfo-ailt (2) agus (3)).

(2) Aon mhéid a íocfar leis an seirbhíseach poiblí lena mbaineann i gcomhlíonadh airbheartaithe an téarma nó an choinníll neamhcheadaithe ar mó é ná an méid is iníoctha leis an seirbhíseach poiblí faoin téarma nó faoin gcoinníoll ceadaithe, tabharfar neamhaird air chun críocha aon teideal pinsin (lena n-áirítear teideal i leith cnapshuime nó teideal i leith íocaíochtaí tréimhsiúla pinsin) atá ag an seirbhíseach poiblí sin a ríomh.

(3) I gcás go n-íocfar méid leis an seirbhíseach poiblí lena mbaineann i gcomhlíonadh airbheartaithe an téarma nó an choinníll neamhcheadaithe ar mó é ná an méid is iníoctha leis an seirbhíseach poiblí faoin téarma nó faoin gcoinníoll ceadaithe—

(a) sealbhóidh an seirbhíseach poiblí an ró-íocaíocht ar iontaobhas don chomhlacht seirbhíseach poiblí, agus

(b) gnóthóidh an comhlacht seirbhíseach poiblí méid na ró-íocaíochta ón seirbhíseach poiblí, go díreach nó trí asbhaint arna tógáil as an luach saothair is iníoctha ina dhiaidh sin leis an seirbhíseach poiblí nó ar shlí eile.

(4) I gcás—

(a) go rachfar isteach i gconradh fostaíochta i leith seirbhíseach poiblí, agus

(b) go mbeidh sa chonradh téarma nó coinníoll i dtaca le luach saothair nach gcomhfhreagraíonn d’aon téarma nó d’aon choinníoll arna cheadú ag an Aire, nó nach bhfuil coibhéiseach le haon téarma nó le haon choinníoll arna cheadú ag an Aire, i leith fhostaíocht aon aicme nó aon chatagóire de sheirbhíseach poiblí faoina dtagann an seirbhíseach poiblí céadluaite (cibé acu a bheidh an ceadú sin i bhfoirm ceadaithe, i bhfoirm aon chineáil eile

cheada nó i bhfoirm toiliú a bheith á thabhairt ag an Aire le haghaidh cinneadh ó dhuine eile sa ní), neamhneofar an téarma nó an coinníoll.

(5) Aon mhéid a íocfar leis an seirbhíseach poiblí lena mbaineann i gcomhlíonadh airbheartaithe aon téarma nó aon choinníll a neamhneofar faoi fho-alt (4), tabharfar neamhaird air chun críocha aon teideal pinsin (lena n-áirítear teideal i leith cnapshuime nó teideal i leith íocaíochtaí tréimhsiúla pinsin) atá ag an seirbhíseach poiblí sin a ríomh.

(6) I gcás go n-íocfar méid leis an seirbhíseach poiblí lena mbaineann i gcomhlíonadh airbheartaithe aon téarma nó aon choinníll a neamhneofar faoi fho-alt (4)—

(a) sealbhóidh an seirbhíseach poiblí an méid ar iontaobhas don chomhlacht seirbhíse poiblí, agus

(b) gnóthóidh an comhlacht seirbhíse poiblí an méid ón seirbhíseach poiblí, go díreach nó trí asbhaint arna tógáil as an luach saothair is infoctha ina dhiaidh sin leis an seirbhíseach poiblí nó ar shlí eile.

(7) Ní mheasfar go ndéantar, le fo-ailt (3) agus (6), teorainn a chur le dliteanas aon duine faoi reacht cuntas a thabhairt sa ró-íocaíocht sin.

(8) I gcás nach bhfuil méid lena mbaineann fo-alt (3) nó (6) gnóthaithe ag an gcomhlacht seirbhíse poiblí lena mbaineann, féadfaidh an tAire a ordú i scríbhinn don chomhlacht sin an méid a ghnóthú de réir fho-alt (3)(b) nó (6)(b), de réir mar a bheidh, faoi dháta sonraithe agus, i gcás go mainneoidh an comhlacht sin an méid a ghnóthú amhlaidh, féadfaidh an tAire an méid a asbhaint as aon deontas nó vóta de chuid an chomhlachta sin, nó as aon íocaíocht eile leis, as airgead arna sholáthar go díreach nó go neamhdhíreach ag an Oireachtas nó as an bPríomh-Chiste nó as toradh fáis an Chiste sin.

(9) Tá feidhm ag an alt seo maidir le téarma nó le coinníoll a chomhaontófar tar éis thosach feidhme alt 12 den Acht um Bearta Airgeadais Éigeandála ar Mhaithe le Leas an Phobail 2015.

(10) Tá éifeacht leis an alt seo d'ainneoin na nithe seo a leanas—

(a) aon achtachán eile,

(b) aon scéim pinsean nó aon socrú pinsean,

(c) aon chomhaontú eile nó aon socrú conarthach eile, nó

(d) aon tuiscint, aon ionchas, aon chiorclán nó aon ionstraim nó aon doiciméad eile.

(11) San alt seo—

ciallaíonn “seirbhíseach poiblí” duine atá fostaithe ag comhlacht seirbhíse poiblí, nó a shealbhaíonn aon oifig nó aon phost eile i gcomhlacht seirbhíse poiblí;

ciallaíonn “luach saothair” díolaíochtaí lena mbaineann nó lenar bhain Caibidil 4 de Chuid 42 den Acht Comhdhlúite Cánacha, 1997.”.